

Lescha davart la restricziun da fiugs artificial

Lescha davart la restricziun da fiugs artificialis

I. Disposiziuns generalas

Art. 1 Intent

¹ La lescha reglescha la restricziun da fiugs artificialis sin il territori communal dalla vischnaunca da Falera egl interess dalla protecziun digl ambient, dalla protecziun dils animals e dalla protecziun encunter la canera.

II. Restricziun da fiugs artificialis

Art. 2 Restricziun da fiugs artificialis sin il territori communal

¹ Sin igl entir territori communal eis ei buca lubiu da schar arder fiugs artificialis che fan canera. Exclus da quei scamond ein fiugs artificialis pli pigns sco bumbas cun surpresas, candeilas magicas, fiugs bengals, vulcans, salvas e murters a caschun da festivitads ecclesiasticas.

² Per occurrenzas specialas sa la suprastonza communal lubir excepziuns ed incassar ina taxa da permissiun ell'altezia da tochen CHF 200.00. Ei exista negin dretg ad ina permissiun excepziunala. La permissiun excepziunala sa vegnir colligiada cun eventualas cundiziuns.

III. Realisaziun

Art. 3 Autoritad

¹ La suprastonza communal ademplescha la funcziun dall'autoritad da polizia. Ella decida davart la concessiun da permissiuns excepziunalas tenor art. 2, al. 2 e davart multas el rom d'ina procedura penala administrativa ordinaria tenor art. 4.

² Ella sa incumbensar singulas unitads d'administraziun ni instituziuns privatas ni publicas adattadas d'exequir singulas incumbensas.

III. Disposiziuns penalas

Art. 4 Procedura penala administrativa ordinaria

¹ Tgi che cunterfa a prescripziuns da questa lescha, a prescripziuns dall'ordinaziun executiva ni a disposiziuns che sebasan sin quella, survegn el rom d'ina procedura penala administrativa ordinaria ina multa tochen CHF 2'000.00.

² Ils cuosts da procedura da tochen CHF 2'000.00 van a cuost dalla persuna punida.

³ En cass da surpassaments levs sa la suprastonza communal admonir la persuna pertuccada.

Art. 5 Procedura da multa disciplinara

¹ Las autoritads executivas han il dretg da castigiar cuntravenziuns encunter la lescha presenta cun ina procedura da multa disciplinara simplificada.

² La multa disciplinara astga importar maximalmein CHF 200.00.

³ Multas disciplinaras san vegnir incassadas directamein al liug ni cun in quen.

⁴ La persuna punida sa pagar la multa disciplinara enteifer il termin da 30 dis. Cun pagar la multa va quella en vigur legala.

⁵ Sche la multa vegn buca pagada, vegn aviarta la procedura penala administrativa ordinaria tenor art. 4.

IV. Disposiziuns finalas

Art. 6 Ordinaziun

¹ La suprastonza communal relai in'ordinaziun per l'execuziun da questa lescha.

Art. 7 Entrada en vigur

¹ La lescha davart la restricziun da fiugs artificials dalla vischnaunca da Falera entra en vigur per immediat cun l'approbaziun entras la radunonza communal dils 4-10-2024.

Approbada dalla radunonza communal dils 4-10-2024.

Il president communal

Il scarvon

Norbert Good

Ivo Speck